

Evangelium vum 6. Sonndeg vun der Ouschterzäit C

Joh 14, 23-29

KONTEXT

Am allgeméng ginn d'Kapitelen 13-17 vum Joh als e Ganzt ugesinn ; se sinn ewéi verschiddefuerweg Krellen, déi uneneegereit sinn : de Jesus schwätzt mat senge Jünger, an duerch si mat all de Jünger, déi nokommen, vun der Zäit, vu wou un hie « verherrlecht » ass, d.h. och vun eiser Zäit ; hie mécht hei quasi säin Testament a seet senge Leit mat Nodrock wat säi leschte Wëllen ass, eng litteraresch Gattung, wéi se méi dacks an der Bibel virkënt (cf. Gen 49 ; Dtn33, 1ff ; Apg 20, 17ff) ; op déi Manéier erkläert de Jesus beim Joh de Sënn vu sengem Doud.

Déi dräi lescht Sonndeger (5., 6., 7. Sonndeg vun der Ouschterzäit) viru Päischten steet an der Liturgie (Joren A, B an C) dem Jesus säi Fortgoen am Mëttelpunkt (net méi seng Operstéiung). – Joh 14, 23-29 soll da wahrscheinlech och duerch de Gedanke vum Jesus sengem Fortgoen un d'Evangelium vum leschte Sonndeg (Joh 13, 31-35) uknäppen. Hei klängt awer och schonn un, datt hien erëm kënnt.

TEXT

De Jesus sot zu senge Jünger (V. 23a):

Eigentlech äntwert de Jesus dem Judas (net dem Judas Iskarioth, cf. V. 22) op seng Fro ; hei am liturgeschen Text äntwert hien awer de Jünger all ; dorunner gesäit een, wéi d'Evangelium vun deem Sonndeg aus sengem Kontext erausgeschnidden ass.

« Wann ee mech gär huet, hält hien sech ... (Vv. 23-24) :

D'**Vv. 23f** gehéieren dem Sënn no eigentlech nach bei d'Vv. vu virdu wou Rieds ass vum Jesus, dee fortgeet. – De Joh beschreiw hei, wat eng chrëschtlech Gemeinschaft vun der net-chrëschtlecher Gemeinschaft (= der Welt/Kosmos, cf. V. 27) ënnerscheid ; esou geet de Frommen hir Hoffnung aus dem Alen Testament an Erfëllung (1Kin 8, 27 ; Ez 37, 26f ; Zach 2, 14, Zitater, déi fromme Judde grad wéi dem Joh senge Chrëschte wahrscheinlech bekannt waren ; hannert dëser Uspillung verstoppt sech gären dem Joh seng Rechtfertegung vum chrëschtleche Glaw géint d''Judden', cf. de leschte Sonndeg d'Situatioun vum Joh senger Gemeinschaft ; cf. am N.T. och 2Kor 6, 16 ; Eph 3, 17 ; Apk 3, 20). – De Joh seet awer net, wat do geschitt, wou een de Jesus net gär huet ! – Mer si matsen an der johannäescher Abschiedsried : et geet drëms Courage an Hoffnung ze maachen (an net méi drëms eng hoart an explizit Kontrovers mat 'de Judden' ze féieren) : Gott selwer kënnt bei d'Chrëschten a bleiw bei hinnen (net : si gi bei hien !). – Dat **Wuert**, un dat deen sech hält, deen de Jesus gär huet an dem Jesus säint net ass, ma dem Papp säint, sinn (ë.a.) d'Geboter (cf. Vv. 15.21), déi de Jesus erkläert huet.

Dëst hunn ech iech gesot ... (V. 25) :

De V. 25 leed zu engem neien 'Abschnitt' iwwer, tselwescht wéi och schonn a Joh 16, 1.4.33.

De Bäistand awer, den hellege Geesch ... (V. 26) :

De Bäistand (=Paraklet/hellege Geesch) gëtt op Ufro vum Jesus duerch Gott oder vun him selwer senge Leit geschéckt (cf. Joh 14, 13f.16.26 ; 15, 16.26 ; 16, 23-26). – D'Jünger, déi de Jesus zu senge Liewzäite gesinn an héieren hunn, erënnere sech (no Ouschteren) un dat, wat hie gemeet a gesot huet ; dat geet awer nëmme mat Hëllef vum Bäistand ; dës Hëllef weist hinnen de Wee fir méi en déift Versteesdemech vun deem, wat geschitt ass ze kréien (cf. 2, 22 ; 12, 16), resp. hie weist hinnen d'Erklärungsméiglechkeeten, d'Äntwerten op d'Fro nom Sënn vum Jesus sengem Liewen a Stierwen duerch de Verwäis op d'Schrëft, eist Aalt Testament (cf. 15, 26 ; 16, 13-15). An engems ass hien de Garant, datt si net ier ginn – an ouni hie geet et net. De Bäistand kënnt an d'Plaz vum Jesus, hëlleft der Gemeinschaft ze bestoen, iwwerdeems hien si un de Jesus bënnt (doduerch datt hien si un säi Wuert erënnert an hinnen dru festhalen hëlleft, cf. 1Joh 2, 1). – D'Synoptiker kennen e Bäistand an dëser Form net, wuël war awer a verschidde Kreiser vum Judentum esou ee Bäistand oder een, dee fir d'Mënsche bei Gott geschwat huet, bekannt.

Fridden hannerloossen ech iech, mäi Fridden ... (V. 27) :

Dëse **Fridden** erënnert un de Grouss vun deem Operstanen (Joh 20, 19. 21 ; cf. och 16, 33) ; dëse Fridden ass en Deel vum Jesus sengem Testament, vun deem, wat seng Leit vun him ierwen. Dëse Fridden/Shalom = méi wéi kee Sträit, mee eng Harmonie tëscht Gott, de Mënschen ënnert eneen an der Natur ; e gehéiert zu de Gowe vun dem messianeschen Zäitalter, dofir sollen d'Chrëschten **net onroueg sinn an net fäerten** (V. 1 ; cf. Jes 9, 5f ; Mi 5, 4 ; besonnesch och de Lk insistéiert op dëse Fridden, cf. Lk 1, 79 ; 2, 14ff ; 7, 50 ; 8, 48 ; 10, 5f ; 11, 21 ; 19, 38.42 ; 24, 36). An der chrëschtlicher Gemeinschaft gëtt hien an der géigesäiteger Léift am Gedenken un de Jesus gelieft, ass dofir **net esou, wéi d'Welt e gëtt**. An der joh Logik provozieren de Glawen un deen Operstanen an d'Léift an der Gemeinschaft der Welt hiren Haass (d'Welt = dem Joh säi Begrëff fir dat, wat negativ ass an de Mënschen als en Deel vun der Welt, déi d'Däischtert léiwer hat an dofir de Jesus net ugeholl huet); provozéiert eng chrëschtlich Gemeinschaft net dësen Haass, dann ass se verweltlecht ; si huet de Shalom verluer – an eng Grenz veeleft tëscht deenen, déi de Jesus gär hunn (also sech un säi Wuert halen, cf. V. 23) an deenen aneren, eng Grenz, déi net nëmme d'Gemeinschaft vun der Welt trennt, mee och d'Leit innerhalb vun der Gemeinschaft.

Dir hutt héieren, datt ech iech gesot hunn, ... (Vv. 28f) :

Eng leschte Kéier resuméiert de Jesus seng Ried : an de Vv. 4-14 huet hie geschwat vun der Verbonnenheet mat him am Glawe, déi bleiwt ; an de Vv. 15-24 vun der Verbonnenheet mat him an der Léift, déi bleiwt ; dëse Fuedem gräift de Joh elo erëm op a féiert e weider : wann si elo scho verstoe géifen, da géifen si sech iwwert dem Jesus säi Fortgoe freeën ; dës Freed gëtt och a Joh 16, 20-22 ; 20, 20 ernimmt a beschriwwen. – De Jesus geet fort duerch den Doud um Kräiz, bei de Papp, dee méi grouss ass wéi hien, d.h. de Papp, deem hie vertraut an trei bleiwt. – De Joh weist de Jesus als deen, dee wees, wuër säi Wee hiféiert (cf. duerch déi ganz Passioun erduerch d'Ev. vu Karfreideg) ; hie hat seng Leit prévenéiert ; esou konnten seng Wieder zu engem 'Zeeche' ginn, duerch dat si zum Glawe gefouert (kënne) ginn –

woubäi 'Glaw?', 'gleewen' am biblesche Sënn 'vertrauen op/Vertrauen hunn an' bedeit.

(Fränz Biver-Pettinger)